

ORDENANZA MUNICIPAL DE USO DE ZONAS VERDES

Transcorrido o período de exposición pública do acordo de aprobación inicial da Ordenanza municipal de uso de zonas verdes adoptado polo Concello Pleno en sesión ordinaria de 4 de febreiro de 2011 sen que se presentaran reclamacións nin suxestións, enténdense segundo o disposto no artigo 49 da Ley 7/85 de Bases de Réxime Local definitivamente aprobada, procedéndose á publicación do texto íntegro no Boletín Oficial da Provincia de Ourense nº 104 do 9 de maio de 2011.

EXPOSICIÓN DE MOTIVOS

A Constitución Española e o Estatuto de Autonomía de Galicia impelen aos poderes públicos a promover as condicións para que toda a cidadanía goce dunha digna calidade de vida.

A Constitución, no seu artigo 45º, recolle que todos teñen o dereito a gozar dun medio ambiente adecuado para o desenvolvemento da persoa, así como o deber de conservalo.

Así mesmo, a Lei 7/1985, do 2 de abril, Reguladora das Bases do Réxime Local, no seu artigo 25, e a Lei 5/1997 da Administración Local de Galicia no seu artigo 80 sinala que o Municipio exercerá, en todo caso, competencias, nos termos da lexislación do Estado e das Comunidades Autónomas, nas seguintes materias:

- a) Ordenación, xestión, execución e disciplina urbanística; promoción e xestión de vivendas; parques e xardíns, pavimentación de vías públicas urbanas e conservación de camiños e vías rurais.
- b) Protección do medio ambiente.

Esta normativa pretende servir como instrumento xurídico que regule o uso e utilización das zonas verdes, parques e xardíns, de maneira que estas manteñan os seus valores ecolóxicos, funcionais e estéticos, evitando a súa alteración, degradación, destrución ou abandono. Así mesmo, a regulamentación de utilización e usos das zonas verdes permitirá aos vixilantes e Policía Local coñecer o alcance das súas obrigas extremando o celo no cumprimento da súa misión.

CAPÍTULO I

DISPOSICIÓN XERAIS, CONTIDO E ALCANCE

Artigo 1. Obxecto

A presente Ordenanza ten por obxecto normalizar e regular a utilización, uso e goce das zonas verdes e espazos libres públicos do Concello de Ourense.

De igual forma, regúlanse todos os aspectos relativos a todos os elementos, vivos e inertes que os integran, coa finalidade de preservar os diferentes hábitats existentes, mantendo o equilibrio ecolóxico entre medio urbano e natural.

Artigo 2. Ámbito de aplicación

O ámbito de aplicación da presente ordenanza é o termo municipal de Ourense e referirase aos seguintes espazos.

- a) Os espazos de dominio e uso público que, estando urbanizados teñan un tratamento e acabado de natureza vexetal.
- b) Os espazos urbanos de dominio privado, pero abertos ao uso público que, estando urbanizados, teñan un tratamento e acabado de natureza vexetal, así como o arboredo e as xardineiras contidas neles.
- c) As xardineiras situadas na vía pública.
- d) O arboredo en aliñación e illado situado na vía pública.
- e) As árbores individuais ou aquelas que constitúan masa arbórea, espazo boscoso, arboredo, ou parque que, independentemente da súa propiedade, polo seu interese paisaxístico, botánico, antigüidade, particularidade salientable, rareza, etc., estean catalogados no Plan Xeral de Ordenación Urbana do Concello de Ourense, ou en desenvolvemento da presente ordenanza.
- f) Os espazos cualificados e clasificados polo Plan Xeral de Ordenación Urbana do Concello de Ourense como Espazos Libres, Parques e Xardíns Públicos.
- g) Os espazos cualificados polo Plan Xeral de Ordenación Urbana do Concello de Ourense como non urbanizables de protección especial polo seu interese natural.
- h) Os montes de propiedade pública e os seus equipamentos.

CAPITULO II DEFINICION E TIPOLOXÍA DE ZONAS VERDES E ESPazos LIBRES

Artigo 3. Definición de zonas verdes

Para os efectos desta Ordenanza, considéranse zonas verdes o conxunto de espazos preservados da edificación con destino á mellora ambiental dos espazos urbanos e que garantan o espaxamento da poboación e protexan as infraestruturas de comunicacións así como as áreas naturais que o requiran.

Artigo 4. Elementos integrantes

As zonas verdes e os espazos libres estarán integrados polos seguintes elementos:

- a) Parques Urbanos, Parques Forestais e Zonas Verdes de ribeira
- b) Xardíns e Prazas Públicas, Áreas de Recreo e Expansión
- c) Arboredo viario, e árbores illadas
- d) Illotes, Glorietas e Medianas

Artigo 5. Glosario e conceptos técnicos

Para os efectos dunha correcta interpretación do contido desta Ordenanza, defínense algúns conceptos técnicos empregados:

1. Céspedede ornamental: É o céspede de elevado carácter estético, finura da folla, elevada densidade, grande homoxeneidade, boa cor en calquera época do ano, e capaz de soportar segas baixas e frecuentes. Son céspedes que necesitan un mantemento moi alto.
2. Céspedede: Cuberta vexetal dunha ou máis especies, xeralmente gramíneas, de porte baixo, que ao ser segada toma un aspecto de tapiz denso.
3. Praderío: Cuberta vexetal de especies herbáceas de porte mediano ou baixo, con predominio de gramíneas e leguminosas. Requiren un mantemento medio a moi baixo. Segundo a súa finalidade poden ter un uso social ou non, e a súa situación adoita ser maioritariamente en ámbito periurbano ou zonas de servizo.
4. Árbore: Planta leñosa que consta dun tronco, ou fuste, que sostén unha copa de ramas e follas, con clara diferenciación de tronco e copa e unha altura total -na súa madurez- superior aos 5 metros.; abarca tamén os grandes arbustos, os bambús, as canas, etc. Para os efectos desta Ordenanza quedan incluídas neste grupo as palmeiras e as árbores que, como consecuencia do seu carácter ornamental, se cultivan con ramas desde o chan en busca de portes tipo piramidal, cónico, etc.

5. Arbusto: Planta cuxa estatura é relativamente baixa e que consta - polo xeral- de varios talos de tamaño similar, que xorden a partir dunha raíz común ou dunha zona próxima ao chan. Ten un crecemento de até 5 metros de altura na súa idade adulta, sen un tronco definido e a copa nace desde o chan.
6. Elemento vexetal: Ser orgánico que crece e vive, pero que non cambia de lugar por impulso voluntario.
7. Macizo / Macizo floral: Agrupación, conforme a un deseño, de plantas de tempada ou vivaces, mesmo árbores e arbustos, que decoran as zonas verdes.
8. Rocalla: Parte do xardín con pedras de bo tamaño, con carácter ornamental e/ou paisaxístico, onde tamén se sitúan elementos vexetais.
9. Parterre: Xardín ou parte del con céspede e flores.
10. Escava: Focha realizada ao redor dunha árbore ou dunha palmeira, especialmente a situada nunha área pavimentada, para permitir a achega de auga de rega ou de choiva e eventualmente a achega de fertilizante, o intercambio gasoso entre o chan e o aire e o engrosamento do tronco sen que o pavimento lle opoña resistencia.
11. Pavimento "duro": Superficie que integra unha zona verde, destinada á circulación ou tránsito, constituída por materiais de fábrica (pedra, lastro, laxes de lousa, lousas prefabricadas, etc.) ou por materiais como regas asfálticas, aglomerado, mesturas bituminosas, formigón, etc.
12. Pavimento "brando": Superficie que integra unha zona verde, destinada basicamente ao tránsito peonil e que está executado con materiais térreos compactados como o xabre, zahorra, mesturas estabilizantes ou terras diversas.
13. Tepe: Porción de substrato cuberto de céspede precultivado en orixe até chegar ao estado completo de madurez, extraído en placas paralelepípedas ou en rolos, que son transportados e finalmente transplantados.
14. Construcións: Obra construída ou edificada.
15. Instalacións: Conxunto de cousas instaladas. Recinto provisto dos medios necesarios para levar a cabo unha actividade profesional ou de lecer.

CAPITULO III

USOS DE ZONAS VERDES E ESPAZOS AXARDINADOS

Artigo 6 - Dereitos e obrigas

- a) Toda a cidadanía ten dereito ao uso e goce dos Espazos Libres e Zonas Verdes, dos Parques Urbanos, dos Parques Forestais das Zonas Verdes de ribeira, dos Xardíns e Prazas Públicas, das Áreas de Recreo e Expansión, do Arboredo viario, das Árbores illadas, dos Illotes, das Glorietas e das Medianas, de acordo co establecido na presente Ordenanza e demais disposicións aplicables. As persoas deberán observar un comportamento e conduta correctos que non atente á convivencia e aos bens públicos.
- b) Os usuarios e usuarias dos Espazos Libres e Zonas Verdes, deberán cumprir as instrucións que sobre a súa utilización figure nos indicadores, anuncios, rótulos e sinais existentes. En calquera caso, deberán atender as indicacións que se formulen desde o Concello.
- c) Nos parques e xardíns con horario de uso, este será determinado polo Concello, horario que figurará nas súas portas e accesos. Este horario poderá ser modificado, segundo as épocas do ano e as necesidades.
- d) As zonas obxecto da presente Ordenanza, pola súa cualificación de bens de dominio e uso público, non poderán ser obxecto de uso privativo para actos organizados que, pola súa finalidade, contido, características ou fundamento, presupoña a utilización de tales recintos con fins particulares, en detrimento de a súa propia natureza e destino.
- e) Cando por circunstancias especiais se autoricen nos devanditos lugares actos públicos, deberanse tomar as medidas previsoras precisas para que a maior afluencia de persoas a estes permita manter a súa limpeza e non cause danos nas plantacións, estruturas e mobiliario urbano.
- f) O/a solicitante ou a entidade en cuxo nome se realizou a solicitude asumirá os gastos da instalación das medidas prescritas segundo o apartado anterior e os gastos de limpeza ocasionados como consecuencia da celebración dos actos autorizados.
- g) En todo caso, tales autorizacións deberán ser solicitadas con antelación suficiente e deberán contar con informes favorables dos Servizos competentes.

Artigo 7 - Celebración de actos, eventos e actividades

- a) Co fin de protexer o patrimonio municipal, a celebración de actos, eventos e actividades deportivas, culturais ou de lecer nas zonas verdes municipais e espazos libres estará regulada e limitada en función da tipoloxía establecida con anterioridade.

b) Para a celebración de actos, eventos e actividades será necesario dispor de informes favorables emitido polos técnicos e/ou responsables do mantemento e conservación das zonas, espazos e elementos, identificados nos apartados a/, b/, c/, e d/ do artigo 4 das presentes ordenanzas.

c) Poderán autorizarse todas aquelas actividades, actos e eventos que non xeren impactos negativos sobre o medio, que non supoñan alteracións significativas da contorna natural e que non supoñan alteracións significativas do confort sonoro ou lumínico diúrno e/ou nocturno.

Artigo 8 - Responsabilidade de danos en zonas verdes

a) A vulneración dos contidos desta ordenanza terán a consideración de infraccións e levarán consigo a imposición de sancións aos responsables, así como a obriga de resarcimento de danos a cargo destes, todo iso con independencia doutras responsabilidades de orde administrativa ou penal nas que puidesen incorrer os infractores.

b) Esta responsabilidade é esixible non soamente polos actos propios, senón tamén polos daquelas persoas de quen se debe responder e daqueles animais dos que sexa posuidor, segundo a normativa aplicable.

c) Cando os danos se produzan con ocasión de actos públicos autorizados, serán responsables os que solicitaron a autorización ou as entidades en cuxo nome a solicitaron.

CAPITULO IV

PROTECCIÓN DA CONTORNA

Artigo 9.- Consideracións xerais sobre protección da contorna

Con carácter xeral, para a boa conservación e mantemento dos diferentes espazos e zonas verdes non se permitirán, agás autorización municipal, as seguintes actividades:

- a) Todo dano ocasionado sobre os elementos vexetais, árbores, plantas, mobiliario, instalacións, casetas e demais elementos que se atopen nas zonas verdes.
- b) Camiñar por zonas acoutadas ou delimitadas
- c) No céspede de carácter ornamental, introducirse nel e utilizalo para xogar, repousar ou estacionarse sobre el.
- d) Talar ou apear árbores situadas en espazos públicos.
- e) Podar, arrincar ou partir árbores, pelar ou arrincar as súas cortizas, cravar puntas, atarilles randeiras, escaleiras, ferramentas, soportes de estruturas, ciclomotores, bicicletas, carteis ou calquera outro elemento, rubir ou subir a eles.
- f) Depositar ou botar aínda que de forma transitoria, sobre as escavas das árbores, materiais de obra ou calquera clase de produtos, elementos ou substancias.
- g) Depositar ou botar aínda que de forma transitoria, nas zonas verdes, calquera tipo de residuo, lixos, cascallo, pedras, papeis, plásticos, graxas ou produtos cáusticos ou fermentables, ou calquera outro elemento, substancia ou produto, que poida danar tanto os elementos vexetais como as instalacións, mobiliario urbano, construcións ou elementos que se atopen nas zonas verdes.
- h) Acender lume, calquera que sexa o motivo, en lugares que non estean expresamente autorizados.

Artigo 10. Protección da tranquilidade, acougo e confort

Para conservar as condicións idóneas de tranquilidade, acougo e confort, inherentes ás zonas verdes, parques, xardíns públicos e zonas axardinadas, esíxese o seguinte:

- a) A práctica de xogos e deportes realizarase nas zonas especificamente acoutadas, cando concorran as seguintes circunstancias:
 - Poidan causar molestias ou accidentes ás persoas.

- Poidan causar danos e deterioracións no material vexetal.
 - Impidan ou dificulten o paso de persoas ou interrompan a circulación.
 - Perturben ou molesten de calquera forma a tranquilidade pública.
- b) Terán que ser autorizadas de maneira expresa polo Concello as actividades artísticas de pintores, fotógrafos, operadores cinematográficos ou de televisión, as filmacións cinematográficas ou de televisión con miras a escenas figurativas e a colocación ou carrexo de apeiros e instalacións de carácter especial para tales operacións. Todas as actividades anteriormente citadas poderán ser realizadas nos lugares utilizables polos usuarios das zonas verdes, sendo a superficie ocupada a menor posible co obxecto de non entorpecer a utilización normal da zona verde, e terán a obriga de cumprir todas as indicacións dadas desde os servizos de mantemento e conservación de zonas verdes.
- c) A venda ambulante de calquera clase de produtos estará limitada e regulada, polo que soamente poderán efectuarse coa correspondente autorización municipal expresa para cada caso concreto, logo dun informe favorable dos técnicos municipais. A instalación temporal de calquera clase de comercios, restaurantes, venda de bebidas ou refrescos, xaderías, churrerías, quioscos, carruseis, atraccións móbiles en xeral, elementos e xogos inchables, casetas feirais etc., estará regulada en virtude do establecido nos artigos 6 e 7 da presente Ordenanza. Se o uso está permitido, levarase a cabo, exclusivamente, sobre zonas nas que existan pavimentos “duros”, quedando expresamente prohibida a colocación sobre o resto de superficies. Para a concesión de autorizacións será necesario dispor de informes favorables, emitidos desde o Concello. No entanto, atenderase a todo o disposto na Ordenanza Municipal de Venda Ambulante (BOP n.º 206 de 08/09/2005).
- d) Os concesionarios de instalacións temporais deberán axustarse estritamente ao alcance da súa autorización, sendo responsables das súas extralimitacións e incumprimento destas. O emprazamento temporal das instalacións poderá verse modificado por causas xustificadas ou por necesidades operativas da Concellaría de Medio Ambiente ou demais Servizos do Concello. As instalacións realizaranse en precario, non procedendo indemnización ningunha polo seu levantamento.
- e) Os soportes que conteñan información de carácter oficial ou institucional poderán ser instalados e situados naqueles puntos asignados de forma expresa e coa consecuente autorización municipal.

Artigo 11.- Prohibicións nas zonas verdes

Nas zonas verdes e espazos libres, está totalmente prohibido, excepto cunha autorización expresa concedida desde o Concello:

- a) Lavar vehículos, roupas ou proceder ao tendido delas e tomar auga das bocas de rega, salvo autorización sinalizada.

- b) Efectuar inscricións, situar ou pegar carteis con publicidade sobre elementos vexetais (árbores, céspede, etc.) cerramentos (muros, valos, enreixados, celosías, etc.), soportes de iluminación pública ou en calquera elemento de mobiliario urbano existente nos parques e xardíns.
- c) Fixar e asegurar as estruturas tipo carpas, toldos, cubertas móbiles e similares mediante a colocación de tensores ou amarres nas árbores, báculos ou mobiliario urbano. Tampouco se permiten as ancoraxes mediante "piquetes" ou estacas sobre céspede, macizos de flores ou arbustos e similares.
- d) Utilizar as árbores ou outros elementos vexetais como soportes ou apoios para a localización de contadores, cableado, e acometidas eléctricas que proporcionan enerxía ás instalacións temporais.
- e) Utilizar as escavas para cravar as picas de toma de terra das instalacións eléctricas.
- f) Realizar no interior dos seus recintos calquera clase de traballos de reparación de automóviles, albanalaría, xardinaría, electricidade, etc.
- g) A realización de actividades industriais, en calquera das súas modalidades.
- h) Realizar actividades de aeromodelismo ou voos con maquetas propulsadas por medios mecánicos.
- i) Está prohibida a acampada, instalar tendas de campaña, caravanas, autocaravanas ou vehículos habilitados para ese efecto, practicar cámping ou establecerse con algunha destas finalidades, calquera que sexa o tipo de permanencia.
- j) Ocupación do espazo público, instalarse con cadeiras, mesas, apeiros e outros elementos, impedindo o normal desenvolvemento das actividades que nel se realizan.
- k) Está prohibida calquera proba ou exercicio de tiro, acender petardos, a utilización de bengalas e os fogos de artificio.

CAPÍTULO V

PROTECCIÓN DO MOBILIARIO URBANO, ELEMENTOS DECORATIVOS, INSTALACIÓNS E CONSTRUCIÓNS

Artigo 12. Uso do mobiliario urbano

- a) O mobiliario urbano existente nas zonas verdes e os espazos libres, está integrado por xogos infantís, xogos biosaludables, bancos, papeleiras, valos, fontes, sinalización, farois, báculos e outros elementos decorativos, como adornos, esculturas, etc.
- b) Deberá manterse seguindo o máis adecuado estado estético e de uso, non podendo, en ningún caso, realizar inscricións ou pinturas sobre eles. Tampouco se permite levar a cabo calquera acto contrario á súa normal utilización ou que prexudique ou deteriore a súa conservación ou impida o seu normal funcionamento.
- c) Así mesmo, serán sancionadas aquelas persoas que, facendo un uso indebido de tales elementos, prexudiquen a boa disposición e utilización destes.

Artigo 13.- Prohibicións e limitacións

En relación co mobiliario urbano, establécense as seguintes prohibicións e limitacións:

- a) Bancos: Non se permitirá o seu uso inadecuado, arrincar os bancos que se atopen fixados ás soleiras ou pavimentos, nin trasladar aqueles que non estean fixados ao chan. Tamén está prohibido agrupar bancos de forma desordenada, deteriorar os seus elementos, desmontalos ou despezalos.
- b) Xogos infantís: Agás nos casos en que expresamente se indique, a utilización dos xogos infantís realizarase exclusivamente por parte de nenos/as de até 12 anos de idade, non permitíndose nestes actividades que afecten á seguridade dos seus usuarios ou prácticas que poidan deterioralos ou destruílos. Queda prohibida a estancia, nas áreas de xogo infantís, de nenos/as de idade superior á indicada, de mocidade ou de adultos, salvo para o coidado e vixilancia das crianzas que usen a área. As persoas encargadas do coidado dos nenos e nenas deberán evitar que estes, nos seus xogos, depositen sobre os bancos area, auga, barro ou calquera substancia que poida ensucialos ou manchar os seus usuarios e usuarias.

c) Papeleiras e valos: Os desperdicios ou papeis deberán depositarse nas papeleiras para tal fin establecidas. Queda prohibida calquera manipulación sobre as papeleiras e valos, movelas, envorcalas e arrincalas, así como facer inscricións nestas, ou todos aqueles actos que puidesen provocar a súa deterioración.

d) Fontes: Queda prohibido aos usuarios realizar calquera manipulación nas conducións e elementos da fonte que non sexan as propias do uso normal para o que están destinadas, así como a práctica de xogos nas fontes de auga potable. Esta prohibida a inxesta da auga utilizada nas fontes ornamentais, chafarices e similares. Tampouco se permite ningún outro uso, bañarse ou introducirse nas súas augas, practicar xogos acuáticos ou usalas para actividades para as que non estean destinadas. Está prohibida a vertedura de calquera substancia -sólida ou líquida- a colocación e introdución de materiais ou elementos alleos a estas.

e) Sinalización, farois, esculturas e elementos decorativos: Nestes elementos de mobiliario urbano non se permitirá rubir, subirse, columpiarse ou facer calquera acción ou manipulación sobre eles, así como calquera acto que os ensucie, prexudique ou deteriore.

f) Outros elementos existentes ou previstos: Calquera elemento ou obxecto que teña a consideración de mobiliario urbano, xa sexa existente ou proxectados, presentará o mesmo nivel de protección que os anteriores, quedando prohibido o pintado, desprazamento, manipulación, e alteración en xeral que puidese provocar mal funcionamento ou deterioración. Por razóns de salubridade deberase ter especial coidado no seu uso.

g) Instalacións: Está prohibido, excepto ao persoal autorizado, manipular, modificar ou realizar cambios sobre as instalacións ou calquera dos compoñentes que as integran ou calquera tipo de actuación que xere danos, deterioración ou menoscabo, á instalación ou a calquera dos seus compoñentes.

h) Construcións: Está prohibido calquera tipo de actuación que produza danos, deterioración, ou menoscabo das construcións.

CAPITULO VI PROTECCIÓN DE ANIMAIS

Artigo 14.- Protección de animais. Actos prohibidos

Para a boa conservación e mantemento das diferentes especies de animais, existentes nas zonas verdes, así como dos lagos, estanques ou cursos de auga existentes neles, están prohibidos os seguintes actos:

- a) Cazar calquera tipo de animal
- b) Inquietar ou molestar a calquera especie de animal, mesmo animais acuáticos; espantar as pombas ou paxaros, perseguilos ou tolerar que os persigan cans ou outros animais.
- c) Pescar, ou causar dano aos peixes e animais acuáticos.
- d) A tenencia en tales lugares de utensilios ou armas destinados á caza de aves ou outros animais, como cepos, escopetas de aire comprimido, etc.

Artigo 15.- Animais de compañía, domésticos e asimilados

- a) Os cans deberán ir conducidos por persoas e provistos de correa, salvo nas zonas debidamente coutadas para eles, circulando polas zonas de paseo dos parques e evitando causar molestias ás persoas.
- b) Está prohibido o tránsito e estancia dos cans en pradarías ou superficies de céspede, penetrar nos macizos axardinados, nos estanques ou fontes.
- c) Está prohibido aproximarse con cans aos xogos infantís, aos areeiros, ás áreas de xogos de adultos ou a calquera zona de similares características.
- d) Está prohibido que os cans espanten as pombas, paxaros ou outras aves. De igual forma impídese incitar ou atacar a outros cans ou felinos.
- e) Os cans non poderán depor os seus dexeccións -sólidas ou líquidas- sobre pradarías de céspede, plantacións, zonas axardinadas, macizos florais ou arbustivos, áreas de xogos infantís, areeiros, canchas deportivas e similares.
- f) Os condutores dos cans -propietarios ou coidadores temporais- serán os responsables da recollida das dexeccións e de limpar os excrementos de forma inmediata, segundo dispónse nas Ordenanzas relativas á limpeza e recollida de residuos vixente na actualidade.
- g) Os condutores dos cans -propietarios ou coidadores temporais- serán responsables do seu comportamento, de acordo coa normativa aplicable.
- h) Nalgunhas zonas verdes como xardíns históricos ou outros de especial valor ambiental, ou naquelas zonas acoutadas pola calidade das súas plantacións ou instalacións, poderá prohibirse expresamente a entrada de cans e outros animais domésticos, coa excepción dos cans guías.
- i) Queda expresamente prohibido, nos espazos axardinados, os labores de aseo dos cans así como o permitir que estes beban das fontes de auga potable ou se introduzan nelas.
- j) As cabalarías non poderán circular polas zonas verdes, parques, xardíns públicos ou zonas axardinadas, excepto naquelas zonas especialmente sinaladas para iso ou nas que se acouten para realizar actividades deportivas organizadas ou autorizadas polo Concello.
- k) Atenderase a todo o disposto na Ordenanza Municipal de Posesión e Custodia de animais (BOP de 08/09/2005).

Artigo 16. Abandono de animais

Os usuarios das zonas verdes e dos espazos axardinados non poderán abandonar, nos devanditos lugares, especies animais de ningún tipo.

Artigo 17. Usos por outros animais

Queda prohibido o acceso de calquera animal ás zonas verdes públicas, salvo autorización expresa por parte do Concello, nese caso circularán por zonas especialmente sinaladas para iso, ou nas que se acouten para realizar actividades culturais ou deportivas.

Os animais non incluídos neste título non poderán circular en ningún caso por parques e xardíns, salvo autorización expresa.

CAPITULO VII

CIRCULACIÓN CON VEHÍCULOS

Artigo 18. Circulación en zonas verdes

A entrada e circulación de vehículos en zonas verdes, parques, xardíns públicos e zonas axardinadas será regulada de forma específica e concreta para cada un deles mediante a correspondente sinalización que, para ese efecto, se instale neles. Os criterios xerais son os seguintes:

1) Bicicletas, patíns e similares.- Só poderán transitar sobre as calzadas e pavimentos onde estea expresamente permitida a súa circulación. En todo caso, non poderán circular nin transitar sobre pradarías ou superficies de céspede, nin penetrar nos macizos axardinados

2) Os vehículos con autorización: Poderán circular por calquera pavimento peonil, sempre que o fagan a unha velocidade inferior a 5 km/h.

3) Circulación de vehículos de transporte.- Está prohibida a circulación de vehículos de transporte no interior de zonas verdes e parques, excepto nos seguintes casos:

a) Os vehículos municipais, destinados ao transporte de persoal, ferramentas, apeiros, plantas, etc. e circularán a unha velocidade máxima de 10 Km/h

b) Os vehículos pertencentes ao Servizo de Limpeza para efectuar labores de baldeo, baleirado de colectores e papeleiras, limpeza de colectores, retirada de residuos verdes, limpeza de estanques, desobstrución de conducións e canalizacións, etc. Circularán a unha velocidade máxima de 10 Km/h

c) Outros vehículos asignados a diferentes servizos do Excmo. Concello de Ourense do Concello e que circularán a unha velocidade máxima de 10 Km/h.

d) Os destinados ao transporte de pezas, elementos e mecanismos que integran as atraccións, casetas feirais, carpas, toldos e similares. Só poderán circular aqueles vehículos cun peso inferior a 3 toneladas, a través dos pavimentos ou calzadas sobre os que estea expresamente permitida a súa circulación e nas horas que autorizarán desde o Concello.

4) Circulación de autocares.- Está prohibido o tránsito con autocares e microbuses. Excepcionalmente, coa autorización do Concello, poderá permitirse a súa circulación sobre pavimentos duros.

Queda prohibida a circulación de calquera vehículo de motor nas zonas de xogos infantís, areeiras e similares.

Está prohibido estacionar vehículos no interior das zonas verdes, parques, xardíns públicos e zonas axardinadas.

Unha vez finalizado o tránsito ou circulación para realizar a tarefa autorizada, os vehículos deberán abandonar as ditas zonas de forma inmediata.

CAPITULO VIII

OBRAS PÚBLICAS E PROTECCIÓN DE ZONAS VERDES

Artigo 19. Obras de carácter público

- a) As obras de carácter público ou aquelas instalacións provisionais (casetas, cadros eléctricos, etc.), que afecten a zonas verdes, parques, xardíns públicos e zonas axardinadas, proxectaranse e executaranse sen que se xeren alteracións no espazo ou nos seus elementos.
- b) En todo caso, elixíranse as áreas pavimentadas para a localización de instalacións ou desenvolvemento de obras, deixando exentas destas as zonas con vexetación.

Artigo 20. Localización de redes de servizos

- a) As redes de servizos (semafórica, eléctricas, telefónicas, de saneamento, distribución de auga, etc.) que teñan que atravesar as zonas verdes deberán facelo de forma subterránea, debidamente canalizadas e sinalizadas, preferentemente por zonas de plataforma, paseos ou pavimentos. Así mesmo, deberán adoptarse as medidas oportunas en orde á protección do sistema radicular do arboredo existente.
- b) As redes municipais de rega (bocas, hidrantes, etc.) serán de uso único e exclusivo para o baldeo e rega dos espazos axardinados. En ningún caso poderán usarse para interese ou finalidade privada, tanto as redes de rega municipal como as de incendios.

Artigo 21. Medidas de protección de arboredo público

- a) As obras que se realicen nas vías públicas, tales como gabias, construcións de bordo, escavas e, en xeral, as derivadas da realización de redes de servizo, acometeranse de tal forma que non ocasionen dano ás plantacións nas vías públicas. Se como consecuencia das obras se danan as plantacións consolidadas, será obrigatoria a reposición destas por parte do titular da autorización, sen prexuízo da sanción que corresponda no caso de negligencia no dano cometido.
- b) Se o Concello o considera oportuno, e a xuízo dos técnicos municipais o transplante fose viable, antes de realizar as obras e con cargo ao titular da autorización, as árbores e plantacións afectadas trasladaranse ao Viveiro Municipal ou lugar que se determine.
- c) Cando as obras de particulares esixan xustificadamente a supresión dunha árbore ou plantación situada en espazo de titularidade municipal, deberase

observar o disposto no Plan Xeral de Ordenación Urbana no seu Artigo 187. Protección de arboredos.

d) No caso de que as obras inhabiliten os espazos que albergaban a zona verde ou vexetación suprimida, o Concello poderá habilitar -á conta do interesado- o adecuado espazo para unha nova plantación, compensando o espazo perdido. O valor do material vexetal será determinado polos técnicos municipais.

Artigo 22.- Gabias e foxos. Pavimentos

a) Cando se abran foxos ou gabias próximos a plantacións de arboredo na vía pública, a escavación deberá afastarse da árbore a unha distancia mínima igual a 6 veces o seu diámetro, medido á altura de 1,20 metros. En calquera caso, esta distancia será sempre superior a 0,7 metros.

b) No caso de que non fose posible o cumprimento desta norma, requirirase a asistencia de técnicos municipais, con anterioridade ao comezo das escavacións, co fin de arbitrar outras posibles medidas de protección.

c) Nos casos en que, durante os traballos de escavación das obras ou de modificación de pavimentos, resulten alcanzadas raíces de diámetro superior a 5 centímetros, estas deberán cortarse de forma que queden seccións con cortes limpos e lisos, que se pintarán a continuación con algunha substancia cicatrizante das existentes no mercado.

d) Nos casos indicados no parágrafo anterior, o "retapado" deberá facerse nun prazo non superior a tres días desde a apertura con terras de cultivo, na súa íntegra volumetría, refugándose os cascallos e mesturas resultantes, e procedéndose a continuación á súa rega.

e) A apertura de gabias -próximas ao arboredo- deberá efectuarse de forma prioritaria na etapa de "parón" ou repouso vexetal. Cando se abran gabias e foxos en zonas verdes públicas, sobre especies herbáceas (céspedes), a área afectada reporase con moita brevidade, empregando para iso "tepes", que deberán ser mantidos polos executores da obra, polo menos durante un prazo de dous (2) meses.

f) As gabias e foxos abertos sobre céspedes levarán, polo menos, unha capa superficial de 30 centímetros de terra de cultivo, sobre a que irán colocados os tepes. En todo caso, deberá contarse co asesoramento e inspección dos técnicos municipais.

CAPITULO IX RÉXIME XURÍDICO

Artigo 23. Denuncias por vulneración Ordenanza

Toda persoa física ou xurídica poderá denunciar ante o Concello de Ourense calquera infracción da presente ordenanza. Os axentes da Policía Municipal velarán, de forma especial, polo cumprimento do disposto nesta Ordenanza, formulando as denuncias que correspondan aos seus infractores.

Artigo 24. Procedemento sancionador

As infraccións cometidas contra o disposto nesta ordenanza estarán sometidas ao réxime sancionador regulado na Lei 30/1992 de Réxime Xurídico das Administracións Públicas e do Procedemento Administrativo Común, na Lei 7/1985 Reguladora das Bases de Réxime Local e no Real Decreto 1398/1993 para o exercicio da Potestade Sancionadora

CAPITULO X

INFRACCIÓNS

Artigo 25. Clasificación

As infraccións clasifícanse en leves, graves e moi graves conforme se determine nos artigos seguintes.

Artigo 26. Infraccións leves

Consideraranse infraccións leves:

1. Manipular ou alterar o material vexetal causándolle danos de escasa importancia.
2. Rubir ou subir a árbores ou arbustos
3. Camiñar sobre zonas acoutadas ou delimitadas mediante sebes, valos ou calquera outro elemento disposto a modo de barreira aínda que non supoña a xeración de danos.
4. Transitar e pisar o céspede de carácter ornamental, xogar sobre el ou estacionarse aínda que non supoña xeración de danos.
5. Circulación de bicicletas, patíns e similares sobre calzadas ou pavimentos con sinalización de prohibición, ou sobre céspedes, ou sobre macizos axardinados.
6. Circulación de bicicletas, patíns e similares a velocidades superiores ás estipuladas na sinalización vertical ou horizontal.
7. Circulación de vehículos "autorizados" a unha velocidade superior a 5 km/h.

Artigo 27. Infraccións graves

Consideraranse infraccións graves:

1. A reincidencia en infraccións leves.
2. Manipular ou alterar o material vexetal causándolle danos de importancia
3. Podar, arrincar ou partir árbores, ou pelar ou arrincar as súas cortizas
4. Cravar puntas nas árbores, atar randeiras, escaleiras, ferramentas, soportes de estruturas, ciclomotores, bicicletas, carteis ou calquera outro elemento
5. Lavar vehículos, roupas ou proceder ao tendido delas, así como tomar auga das bocas de rega.
6. Botar calquera tipo de residuo en calquera das zonas verdes tipificadas nesta Ordenanza, así como a provisión de materiais de obra ou limpeza sobre as escavas de arboredo ou verter nelas calquera clase de produto.

7. Acender lume, calquera que sexa o motivo, en lugares que non estean expresamente autorizados.
8. A práctica de xogos ou deportes fóra de zonas acoutadas para ese efecto, ou naqueles espazos nos que se atope expresamente prohibido mediante sinais descritivos ou gráficos.
9. As actividades artísticas de pintores, fotógrafos e operadores cinematográficos, e as filmacións cinematográficas ou de televisión cando non se atopen autorizadas de forma expresa polo Concello.
10. Colocar soportes que conteñan información sen contar coa preceptiva autorización municipal.
11. Efectuar inscricións, colocar ou pegar carteis e fixar publicidade sobre elementos vexetais, muros, cerramentos, soportes verticais ou calquera elemento de mobiliario urbano.
12. Facer un uso indebido dos bancos situados nas zonas verdes.
13. Facer un uso indebido dos xogos infantís e áreas de xogos.
14. Facer un uso indebido ou causar dano, menoscabo ou deterioración no mobiliario urbano, valos, sinalización, esculturas, ou calquera outro elemento emprazado nas zonas verdes.
15. Inquietar, molestar, perseguir, espantar ou acosar calquera especie animal, que se atope, de forma permanente ou temporal, nunha zona verde.
16. Permitir que os cans circulen libremente e sen que vaian provistos de correa en calquera tipo de zona verde.
17. Transitar ou permanecer con cans nas pradarias ou superficies de céspede, penetrar nos macizos axardinados, así como nos estanques e fontes.
18. Non recoller as dexeccións dos animais e efectuar a limpeza do lugar de forma inmediata.
19. Efectuar labores de aseo dos cans e permitir que beban das fontes ou se introduzan nelas.
20. Circular con cabalarías ou acceder con calquera animal por zonas verdes, excepto naquelas zonas acoutadas para ese efecto para a realización de actos autorizados polo Concello.
21. Circular e/ou estacionar vehículos de transporte, autocares e outros en zonas verdes, fóra dos medios pertencentes ao Concello de Ourense e aqueles autorizados expresamente e de forma provisional.
22. Efectuar acampada, instalar tendas de campaña, caravanas, autocaravanas ou vehículos similares, calquera que sexa o tipo de permanencias.
23. Ocupación do espazo público, instalarse con cadeiras, mesas, aveños e outros elementos, impedindo o normal desenvolvemento das actividades que no se realizan

Artigo 28.Moi Graves

Consideraranse infraccións moi graves:

A reincidencia en infraccións graves.

1. Talar ou apear árbores situadas en espazo público (art. 9.e)
2. A realización de prácticas industriais ou similares, en calquera das súas modalidades.
3. Efectuar actividades de aerodelismo ou voo con maquetas propulsadas por medios mecánicos.
4. Realizar probas ou exercicios de tiro, acender petardos, utilizar bengalas e fogos de artificio.
5. A venda ambulante de calquera tipo de produtos, que non dispoña de autorización municipal.
6. A instalación temporal de calquera clase de comercios, restaurantes, venda de bebidas ou refrescos, xeaderías, churrerías, quioscos, carruseis, atraccións móbiles en xeral, elementos e xogos inchables, casetas feirais etc., sen as preceptivas autorizacións municipais.
7. Fixar e asegurar estruturas tipo carpas, toldos, cubertas móbiles e similares mediante a colocación de tensores ou amarres nas árbores, báculos ou mobiliario urbano. Tampouco se permite as ancoraxes mediante "piquetas" ou estacas sobre céspede, macizos de flores ou arbustos e similares.
8. Utilizar as árbores ou outros elementos vexetais como soportes ou apoios para a localización de contadores, cableado e acometidas eléctricas que proporcionan enerxía ás instalacións temporais.
9. Realizar no interior dos seus recintos calquera clase de traballos de reparación de automóbiles, albanaría, xardinaría, electricidade, etc.
10. Cazar, pescar ou danar calquera animal.
11. Introducirse con cans na zona de xogos infantís, nos areeiros e en áreas de xogo de adultos, ou en calquera outra zona de similares características.
12. Permitir que os cans depoñan as súas necesidades -sólidas ou líquidas- sobre pradarías de céspede, plantacións, zonas axardinadas, macizos florais ou arbustivos, áreas de xogos infantís, areeiros, canchas deportivas e similares.
13. Acceder con cans a zonas verdes -especialmente a xardíns históricos-, nos que figure expresamente a prohibición de entrada aos devanditos animais.
14. Circular sen autorización, con calquera tipo de vehículo de motor polo interior das zonas de xogos infantís, areeiros e similares.

CAPITULO XI SANCIONES

Artigo 29. Competencia Sancionadora

O exercicio da potestade sancionadora correspóndelle á Xunta de Goberno Local segundo o artigo 127.1.1) da Lei 7/1985, de 2 de abril, reguladora das Bases de Réxime Local, agás que conforme á normativa sectorial correspondente se lle atribúa a outro órgano

Artigo 30. Sancións

As infraccións dos preceptos establecidos na presente Ordenanza serán sancionadas polo Concello de acordo co establecido na Lei 7/1985 de 2 de abril de Bases de Réxime local na forma seguinte:

- a) As infraccións leves con multa de 30 a 750 euros.
- b) As infraccións graves con multa de 751 a 1500 euros.
- c) As infraccións moi graves con multa 1501 a 3000 euros.

A contía das sancións graduarase tendo en conta a natureza dos prexuízos causados, a intencionalidade, reincidencia e demais causas que puidesen concorrer.

Entenderase que incorre en reincidencia quen tivese sido obxecto de sanción firme por unha infracción da mesma natureza das reguladas nesta Ordenanza no termo dun ano.

Artigo 31. Responsabilidade

Serán responsables as persoas físicas ou xurídicas que realicen os actos ou incumpran os deberes que constitúan a infracción. Esta responsabilidade será esixible non só polos actos propios, senón tamén polos daquelas persoas por quen se debe responder e polos animais que se posúan, en aplicación dos artigos 1903 e 1905 do Código Civil.

Artigo 32. Infraccións a outras disposicións

No suposto de que a infracción cometida contra a presente Ordenanza vulnerase outros preceptos, leis xerais ou especiais, darase traslado do feito, por parte do Concello, á Autoridade ou Administración competente para o seu coñecemento e efectos legais procedentes.

Artigo 33. Reposición e indemnización

En todo caso, se as condutas sancionadas causasen danos ou prexuízos aos bens municipais, a resolución do procedemento poderá, nos termos establecidos no artigo 22 do RD 1398/93, de 4 de Agosto, declarar:

- a) A esixencia ao infractor da reposición para o seu estado orixinario da situación alterada pola infracción.
- b) A indemnización polos danos e prexuízos causados, cando a súa contía quedase determinada durante o procedemento.

DISPOSICIÓN FINAL

Primeira.-

A Alcaldía queda facultada para ditar cantas ordes ou instrucións resulten necesarias para a adecuada interpretación, desenvolvemento e aplicación desta Ordenanza, disposicións que quedarán incorporadas como Anexos á esta.

Segunda.-

A presente Ordenanza publicarase no Boletín Oficial da Provincia e entrará en vigor unha vez que se publique completamente o seu texto e transcorra o prazo de 15 días previsto nos artigos 70.2 e 65.2 da Lei 7/1985 Reguladora das Bases de Réxime Local.